



**NOGOMETNI/FUDBALSKI SAVEZ BiH**

# **PRAVILNIK**

**o reprezentacijama NS/FS BiH**

**Sarajevo, septembar 2014.**

Na osnovu člana 35. Statuta Nogometnog/Fudbalskog saveza Bosne i Hercegovine, Izvršni odbor Nogometnog/Fudbalskog Saveza Bosne i Hercegovine (u daljem tekstu: NS/FS BiH) na sjednici održanoj 26.05.2014. godine, donio je

## **P R A V I L N I K** **o reprezentacijama NS/FS BiH**

### **I. OSNOVNE ODREDBE**

#### **Član 1.**

Pravilnikom o državnim reprezentacijama (dalje u tekstu: Pravilnik), utvrđuje se odredbe koje se odnose na sljedeće:

- vrste i nazivi državnih reprezentacija,
- obaveze klubova prema državnim reprezentacijama,
- selektor i stručni štab državnih reprezentacija,
- delegacija NS/FS BiH,
- standardi državne reprezentacije.

#### **Član 2.**

Državne nogometne reprezentacije predstavljaju državu Bosnu i Hercegovinu i NS/FS BiH na međunarodnim takmičenjima i ostalim međunarodnim nastupima.

#### **Član 3.**

Primjenom ovog Pravilnika, obavezujuće su i odredbe „Pravilnika o statusu i transferima igrača FIFA-e“.

### **II. VRSTE I NAZIV DRŽAVNIH REPREZENTACIJA**

#### **Član 4.**

Državne reprezentacije, podrazumijevaju sljedeće:

1. Olimpijsko-Mediterranska reprezentacija koju čine registrovani igrači do 23 godine, starosti, odnosno oni koji imaju pravo igranja u kvalifikacijama i na Olimpijskim igrama,
2. Juniorska reprezentacija „U-19“ koju čine registrovani igrači do 19 godina starosti,
3. Kadetska reprezentacija „U-17“ koju čine igrači do 17 godina starosti,
4. Pionirska reprezentacija „U 15“ koju čine igrači do 15 godina starosti,
5. Ženska „A“ reprezentacija koju čine igračice – seniorke,
6. Ženska juniorska „U-19“ reprezentacija koju čine igračice do 19 godina starosti,
7. Ženska kadetska „U-17“ reprezentacija koju čine igračice do 17 godina starosti,
8. Futsal reprezentacija, koju sačinjavaju igrači klubova futsala.

NS/FS BiH može formirati i druge reprezentacije i organizovati nastupe tih reprezentacija.

#### **Član 5.**

Boje državnih nogometnih/fudbalskih reprezentacija Bosne i Hercegovine su: plavo, plavo, plavo.

Rezervne boje su: bijelo, bijelo, bijelo.

Sportska/tehnička oprema državnih reprezentacija je označena grbom NS/FS BiH.

#### **Član 6.**

Državne reprezentacije Bosne i Hercegovine sastoje se od odabranih igrača, selektora, članova stručnog štaba i vodstva reprezentacije (u daljnjem tekstu: učesnik reprezentacija).

### **III. OBAVEZE KLUBOVA**

#### **Član 7.**

Obaveza je svakog kluba u Bosni i Hercegovini da u provođenju programa reprezentativnih aktivnosti NS/FS BiH, stavi na raspolaganje svoje igrače, stručne i druge potencijale NS/FS BiH, a prema unaprijed utvrđenom kalendaru.

U skladu sa Pravilnikom FIFA-e o statusu igrača, utvrđuje se obaveza svakog kluba izvan granica BiH da se u provođenju reprezentativnih aktivnosti stave na raspolaganje igrače reprezentacije BiH koji igraju za ekipe iz inostranstva,

#### **Član 8.**

Izabranom kandidatu klub je dužan omogućiti sudjelovanje na pripremama i nastupima reprezentacija, kao i ostvarivanje posebnih i pojedinačnih programa igrača, koje mu odredi selektor reprezentacije.

#### **Član 9.**

Ako je za nedolazak ili zakašnjenje učesnika reprezentacije na pripreme reprezentacije odgovoran klub, isti će biti kažnjen odgovarajućom disciplinskom mjerom iz Disciplinskog pravilnika NS/FS BiH, koju će mu odrediti Disciplinska komisija NS/FS BiH. Zahtjev za pokretanje postupka podnose selektor, tehnički direktor, sekretar reprezentacije ili Generalni sekretar.

#### **Član 10.**

Za učešće svojih igrača u reprezentacijama Bosne i Hercegovine, klubovi ne mogu tražiti nikakvu novčanu naknadu prema bilo kakvoj osnovi, osim u skladu sa relevantnim Pravilnicima i dugim aktima FIFA / UEFA.

### **IV. OBAVEZE IGRAČA**

#### **Član 11.**

Za državne reprezentacije Bosne i Hercegovine mogu nastupiti državljani Bosne i Hercegovine, u skladu sa propisima FIFA-e.

#### **Član 12.**

Pozvani igrač dužan je odazvati se na pripreme i nastupe državne reprezentacije.

#### **Član 13.**

Za reprezentaciju ne mogu nastupiti igrači koji su pod suspenzijom ili kaznom bilo kojeg disciplinskog organa, U slučaju da se protiv igrača vodi disciplinski postupak bez suspenzije, relevantni selektor odlučuju o pozivanju takvog igrača zavisno od disciplinskog prekršaja.

#### **Član 14.**

Igrač državne reprezentacije Bosne i Hercegovine, dužan je dostojno predstavljati državu Bosnu i Hercegovinu u zemlji i inostranstvu, na fudbalskom terenu i izvan njega, te maksimalno uložiti znanje i sposobnosti cilju postizanja što boljeg rezultata, sve u skladu sa Pravilima nogometne/fudbalske igre i „fair play“ ponašanjem.

#### **Član 15.**

Izabrani igrač pozvan za nastup u državnu reprezentaciju ne može u vrijeme reprezentativne aktivnosti odlaziti na turnire/turneje sa svojim klubom, osim u slučaju kada to odobri selektor te državne reprezentacije.

Sudionici u programu reprezentacije ne mogu u vrijeme reprezentativnih nastupa izostati iz programa reprezentacija bez odobrenja.

#### **Član 16.**

Na pripremama i nastupima državne reprezentacije, izabrani igrač dužan je pridržavati se uputa i naloga za treninge, utakmice, tokom boravka na pripremama, pročitati upute i potpisati izjavu o korištenju sportske opreme, pročitati upute o prehrani i lijekovima, te pridržavanja svih drugih uputa dostavljenih od strane selektora državne reprezentacije.

#### **Član 17.**

Nakon utvrđivanja spiska igrača za određene aktivnosti državne reprezentacije NS/FS BiH, Administracija NS/FS BiH pismeno šalje pozive igračima sa spiska.

#### **Član 18.**

Učešće u reprezentaciji igrač može otkazati samo iz opravdanih razloga.

Opravdanim razlogom smatra se smrtni slučaj ili teška bolest u užoj porodici, teža povreda ili bolest.

Igrač je u slučaju teže povrede ili bolesti obavezan doputovati u zakazano mjesto, osim u izuzetnim slučajevima, koje su predmet odobrenja selektora, na prijedlog doktora odnosno državne reprezentacije.

Stepen povrede igrača ili njegove bolesti će utvrditi doktori reprezentacija NS/FS BiH.

Ukoliko doktori reprezentacije smatraju da igrač treba biti dodatno pregledan, isti je dužan odazvati se pozivu na dodatni pregled u roku od 24 (dvadesetčetiri) sata.

U slučaju neodazivanja i nedolaska na dodatni ljekarski pregled, smatrat će se da je igračev izostanak neopravdan.

### **Član 19.**

U slučaju da se pozvani igrač ne može odazvati pozivu, dužan je o tome pismeno obavijestiti selektora putem Administracije NS/FS BiH.

Pismeni otkaz sa obrazloženjem koje se šalje u roku od 48 (četrdesetosam) sati od prijema pismenog poziva, može umjesto igrača poslati i njegov klub.

### **Član 20.**

Igrač koji otkaže nastup u državnoj reprezentaciji zbog povrede ili bolesti, dužan je uz otkazivanje nastupa priložiti svu prateću medicinsku dokumentaciju, koja je vezana uz povredu ili bolest, zbog kojih se otkazuje učešće u reprezentaciji.

### **Član 21.**

Protiv igrača koji bez opravdanog razloga zakasni ili se ne odazove na pripreme i nastup u reprezentaciji, na zahtjev selektora će biti podnesena disciplinska prijava Disciplinskoj komisiji NS/FS BiH u skladu sa članom 9. ovog Pravilnika.

### **Član 22.**

Igrači državnih reprezentacija NS/FS BiH imaju određene obaveze u smislu marketinških, sponzorskih i drugih aktivnosti. Svi igrači su dužni izvršavati takve vrste obaveza (tri puta u jednoj kalendarskoj godini), bez (uz novčanu naknadu kada igrač dolazi samo zbog izvršavanja sponzorskih aktivnosti predviđenih ugovorom NS/FS BiH i sponzora) ikakve novčane ili bilo koje druge nadoknade. Igrači su dužni:

- a) učestvovati u svim aktivnostima, nastupima, publikacijama NS/FS BiH u svrhu promocije NS/FS BiH, posebno na televiziji, radiju ili štampi, kao i na javnim priredbama, potpisivanju autograma, sponzorskim manifestacijama, davanjima počasti kada se zato ukaže potreba. Tokom tih aktivnosti igrač mora nositi sportsku opremu i odjeću koju mu na raspolaganje stavlja NS/FS BiH, a prema nalogu NS/FS BiH-a;
- b) Svaki igrač državnih reprezentacija Bosne i Hercegovine, prenosi prava na upotrebu svog lika na korištenje NS/FS BiH-a, a to se posebno odnosi na sve sadašnje i buduće tehničke medije i institucije, portale, uključujući i multimedije (Internet, on-line službu i sl.). To osobito vrijedi za fotografije igrača, pojedinačno ili cijele ekipe, naročito što se tiče određenih momenata iz utakmica i/ili cijelih utakmica reprezentacije, a u svrhu da NS/FS BiH može ispuniti svoje obaveze iz relevantnih ugovora;

- c) Igrači državnih reprezentacija Bosne i Hercegovine mogu davati izjave za javnost, intervju za štampu, radio, televiziju i portale ( u toku priprema prema izboru selektora ), na način da to ne šteti NS/FS BiH-a, niti nogometu/fudbalu u cjelini. Izjave koje se odnose na unutrašnje stvari NS/FS BiH-a, posebno o treningu, taktici i sl. mogu se davati samo uz prethodnu suglasnost NS/FS BiH-a. Protiv igrača koji da štetnu izjavu po NS/FS BiH, selektora ili zaposlenika u stručnom rukovodstvu reprezentacije, vodstvu reprezentacije, drugom igraču državnih reprezentacija BiH ili o zaposleniku administracije NS/FS BiH-a, biti će pokrenut disciplinski postupak pri Disciplinskoj komisiji NS/FS BiH;
- d) Igrači reprezentacije su obavezni izvršavati sve ostale marketinške, promotive, kao i druge aktivnosti koje odredi rukovodstvo NS/FS BiH-a (mogućnost ostvarivanja novčanog bonusa za igrače u zavisnosti od novčane vrijednosti ugovora);
- e) Protiv igrača koji prekrši bilo koju od prethodnih odredbi iz ovog člana, na zahtjev rukovodstva NS/FS BiH-a biti će pokrenut disciplinski postupak pri Disciplinskoj komisiji NS/FS BiH-a;
- f) Prihod od promotivnih aktivnosti, sponzorskih predstavljanja ili bilo koje druge marketinške aktivnosti, pripada isključivo NS/FS BiH.

### **Član 23.**

Za pripremu i igranje u reprezentaciji, odabranom i pozvanom igraču, pripada naknada za putne troškove, troškove boravka na pripremama, te dnevna naknada u visini određenoj odlukom IO NS/FS BiH-a.

Posebnim aktom, Pravilnikom o nagrađivanju igrača, regulišu se preostale finansijske obveze NS/FS BiH-a prema igračima, selektoru, stručnom štabu reprezentacije, kao i vodstvu reprezentacije Bosne i Hercegovine.

Prilikom obavljanja ugovorom obaveznih sponzorskih aktivnosti, igrači će za svoj dolazak imati plaćene dnevnice i putne troškove za vrijeme koje provedu u svrhu svog angažmana.

## **V. SELEKTORI I STRUČNI ŠTABOVI DRŽAVNIH REPREZENTACIJA**

### **Član 24.**

Svaka državna reprezentacija iz člana 4. ovog Pravilnika ima selektora kojeg na prijedlog predsjednika Tehničkog komiteta NS/FS BiH imenuje Izvršni odbor NS/FS BiH. Status, prava i dužnosti selektora utvrđuju se posebnim ugovorom.

### **Član 25.**

Uz selektora pojedine državne reprezentacije iz člana 4. ovog Pravilnika, određuje se i stručni štab.

Sastav stručnog štaba reprezentacije predlaže selektor reprezentacije u saradnji sa Tehnički direktorom NS/FS BiH. O prijedlogu Odluke raspravlja Tehnički komitet NS/FS BiH, a odluku donosi IO NS/FS BiH.

#### **Član 26.**

Selektor i stručni štab obavezni su izraditi program aktivnosti reprezentacija u saradnji sa direktorom Tehničkog sektora NS/FS BiH.

Program aktivnosti usvaja IO NS/FS BiH, uz prethodnu raspravu na Tehničkom komitetu NS/FS BiH-a.

#### **Član 27.**

Po završetku svake reprezentativne aktivnosti, selektori su dužni podnijeti izvještaj o takvoj aktivnosti IO NS/FS BiH

Prije rasprave o izvještaju selektora IO NS/FS BiH-a, Tehnički komitet NS/FS BiH-a daje svoje mišljenje o izvještaju.

Ukoliko selektor ne ispunjava, tj. ne provodi usvojeni program reprezentativnih aktivnosti, IO NS/FS BiH može selektora razriješiti dužnosti, u skladu sa ugovornim odredbama.

#### **Član 28.**

Selektor i ostali članovi stručnih štabova reprezentacija dužni su pridržavati se Statuta NS/FS BiH, ovog Pravilnika, kao i svih ostalih općih akata NS/FS BiH.

#### **Član 29.**

Protiv selektora ili člana stručnog štaba koji svojim radnjama i postupcima nanese materijalnu štetu i učini štetu ugledu NS/FS BiH, nogometu/fudbalu općenito, može se pokrenuti disciplinski postupak.

### **VI. DELEGACIJA NS/FS BiH**

#### **Član 30.**

IO NS/FS BiH, na inicijativu Predsjednika NS/FS BiH, imenuju vodstvo reprezentacije NS/FS BiH-a, koje predstavlja NS/FS BiH prilikom reprezentativnih aktivnosti .

Članovi vodstva reprezentacije imenuju se iz redova IO NS/FS BiH, Odbora za posredovanje i savjetovanje, Generalnog sekretarijata, a u posebnim situacijama mogu se imenovati i druge osobe koje mogu doprinijeti ugledu NS/FS BiH.

### **VII. STANDARDI REPREZENTACIJA**

#### **Član 31.**

Za državne nogometne/fudbalske reprezentacije Bosne i Hercegovine iz člana 4. ovog Pravilnika, utvrđuju se sljedeći standardi:

#### **„A“ REPREZENTACIJA**

a.) SPORTSKA OPREMA – za igrače

**NEPOVRATNO:**

- Svečano odijelo, košulja, kravata i cipele,
- Oprema za slobodno vrijeme (casual),
- Čarape,
- Dres „replika“ za zamjenu nakon utakmice.

b.) SPORTSKA OPREMA – za stručni štab

**NEPOVRATNO:**

- Svečano odijelo, košulja, kravata i cipele,
- Oprema za slobodno vrijeme (casual),
- Čarape,
- Dres „replika“ za zamjenu nakon utakmice.

Sva ostala sportska oprema treba biti vraćena u ekonomat NS/FS BiH na osnovu izdatog reversa.

Sportska oprema koja je sadržana u povratnoj opremi „A“ reprezentacije (igrači i stručni štab), a bude ostavljena izvan okvira opreme koja je zadužena, biti će naplaćena od svakog reprezentativca pojedinačno, prema utvrđenoj veleprodajnoj cijeni sportske opreme od dobavljača NS/FS BiH-a.

Kod svih ostalih nogometnih/fudbalskih reprezentacija Bosne i Hercegovine, kompletna sportska oprema je povratna.

Kompletna povratna sportska oprema koja ne bude vraćena na vrijeme od sudionika reprezentacije, biti će naplaćena po nabavnim cijenama.

**Član 32.**

O opremi reprezentacija brigu vodi ekonom/i NS/FS BiH, koji su materijalno zaduženi sportskom opremom.

Uputstvo o radu sa sportskom opremom reprezentacija Bosne i Hercegovine, čuvanju i održavanju opreme, kao i vođenju evidencije opreme reprezentacija daje Generalni sekretar NS/FS BiH, na prijedlog direktora Sektora za opšte poslove NS/FS BiH-a.

**VIII. OSIGURANJE ČLANOVA REPREZENTACIJE**

**Član 33.**

Igrači, selektor, članovi stručnog štaba i vodstva nogometnih/fudbalskih reprezentacija Bosne i Hercegovine, za vrijeme priprema ili takmičenja pojedinih reprezentacija, osiguravaju se kod osiguravajućih društava – partnera NS/FS BiH, od rizika povrede ili nesreće.

**IX. ZAVRŠNE ODREDBE**



**Član 34.**

Usvajanjem ovog Pravilnika stavljaju se van snage ranije doneseni propisi NS/FS BiH koji se odnose na državne reprezentacije NS/FS BiH.

**Član 35.**

Izmjene i dopune ovog Pravilnika vrše se u skladu i kao u postupku njegovog donošenja.

**Član 36.**

Ovaj Pravilnik stupa na snagu danom donošenja i objavljuje se u Službenom glasniku NS/FS BiH.

**PREDSJEDNIK**

**Elvedin Begić, s.r.**